



James Bond actress Molly Peters  
alima nungi pilaogo

Thailand Open nung Sai Praneeth  
Quarter-finals tongogo

## Cyclone 'Mora' ajanga Nagaland nung nisung ana süogo

**Kohima, June 01 (TYO):** Yipru mopung tesashi 'Mora' ajanga Nagaland-a kongshia nisung ana süogo aser kar samaogo, ta tanü Nagaland State Disaster Management Authority, Home Department-i metetdaksü.

Phek district kübok Meluri nung nisung pezü samaa liasü aser tang tashi nung tasü mang ana ngutetogo; tetsür ka tasü mangbo Myanmar kübok Shera yimdak nung ang angu, ta kasa osang ajanga metetdaksü.

Ano Phonkhuri circle nung

apu pezü tzü agi ponger ogo, ibayongji Phonkhuri yimdak tesendaktep lenmang ajak shibangogo.

Iba yipru mopung ajangasa Zunheboto district nung Airtel tower kübok aliba Aghunato yimdak anentsüh aluba ajanga yangji alirtem lendong ajurutsüsa lir. Iba dak sendakba nung District Disaster Management Authority den town committee-i iba tower belentsü atema Guwahati nung Airtel Company den tongtepratepdar, ta kasa osang ajanga metetdaksü.

## Longon-i Nagaland nung Health scheme pezü tenzüksü



Kohima, June 01, 2017: Minister Longon-i state nung kanga junga inyaktetba district hospital, Imkongliba Memorial District Hospital, Mokokchung nem award agütsüba noksa nung angur.

**Kohima, June 01 (TYO):** Nagaland nung aliba yimtsüngtem nung anema-alibaren jenjang ajungkettsütsü atema tanü Health & Family Welfare Minister, P Longon-i Nagaland Health Project (NHP) densema tongtibang health schemes pezü tenzüksüogo.

NHP ya World Bank-i sen crore aikati yariba project ka lir, aser Centre-i yariba tanü ngba health schemes asemji- National Vector Borne Disease & Control Programme (NVBDCP) kübok Malaria Elimination, Rashtriya Swasthya Bima Yojana (RSBY) aser Jan Aushadhi (Generic Drugs) lir.

Tanü Capital Convention Centre, Kohima nung item project tenzükba sentong nung World Bank nungi züngsemtem, State MLA tem aser HFW Department Nagaland nungi ketdangsertem dena liasü.

Iba sentong nung jembidang Longon-i, iba project ya ajanga health department yaria anema alibaren service balala tajungba akumtsü imlar, aser state nung tongtibang tesemtem nung nüburtemi aikati item teyari agütsü imlar, ta metetdaksü.

World Bank-i yariba NHP mapangji küm 5-6 asütsü aser iba project nungji sen ajak agi crore 390.5 tashi intoktsü. Iba nungji tangalen nungi teyari sen crore

312.5 aser State sorkar senpong nungi sen crore 78 intoktsü, ta metetdaksa Minister-i World Bank aser India sorkar dang, iba programme ulushia maneni state nung aliba yimtsüngtem nung anema alibaren jenjang ajungkettsütsü mepishi.

Longon-isa nüburtem danga iba khuret agia ochishia aser meranga inyakba ajanga iba project nung aliba nükjiongtem ataloktsü ajungshi.

World Bank nung Health Specialist, Mohini Kak-i iba project okila metetdaksüdang, iba ama project ya North East nung tang mezü ng tenzük, ta ashi.

Kasa sentong nungsa Project Director, Nagaland Health Project, Dr. Vizolie Suokhr-i Nagaland Health Project indang aser State Project Officer, NVBDCP, Dr. Kevichusa Medikhu-i Malaria Elimination indang metetdaksa liasü.

Directorate of Health & Family Welfare HoD, Dr. N. Bendangyanger Jamir-i lokti pelaa agizük aser Principal Secretary, Menukhol John-i anküp o jembia liasü.

Sentong nungsa state nung kanga junga inyaktetba district hospitals, Primary Health Centres aser Community Health Centres nem awards agütsü liasü.

## 27 buba NSF lokti senden tembangogo Sorkar mapa nung dang memetaloktsüla: Minister Vikheho



June 01, 2017 nü Tzurangkong, Mokokchung nung 27buba NSF lokti senden nung tang tasen shimba NSF office ketdangpurtem lokti dang tejak shioba noksa nung angur.

**Tzurangkong (Mokokchung), June 01 (TYO):** Tzurangkong, Mokokchung nung 27buba Naga Students Federation (NSF) lokti senden May 30, 2017 nü tenzük liasü, aser tanü nikongdang PWD (R&B) Minister, Y Vikheho Swu tetushi tejaoker süa iba senden tembangogo.

Iba sentong nung jembidang Vikheho Swu-i kaketshirtem dang shinga dak memetaloki peisasa litettsü ayongzük.

Iba senden omen 'Amelioration' dak sendakba nung Minister-i, Naga nung lokti asüngsashitsü nüngdaker; tanü Naga lokti nung telemsa adoka lir, anungji Naga nungeri longjemtsü atema inyaksüla, ta metetdaksü.

Kaketshirtemi sorkar mapa nung dang metalokba atema tesasaba olen ka nung minister-i, Naga nung atemabo mapa tetezü, sorkar mapa dang lir; tanga

sector talisa nija sector nung maongka mebushir, ta ashi.

Iba dak sendakba nung pai, sorkar mapa nung mapa makai kümogo, anungji kaketshirtemi tangar dak memetaloki peisasa litettsü atema inyaksüla, ta ajungshi.

Minister-isa, Nagaland sorkar mapa nung nisung kanga tali kümogo, anungji kaketshirtemi shishilembaba mapa inyaksüla, iba den külemi mapa bushir ka masü saka mapa agütsür ka akümsüla, ta ajungshi.

### 2017-19 atema NSF ketdangpurtem:

- |                            |                           |
|----------------------------|---------------------------|
| 1. President               | : Kesosul Christopher Ltu |
| 2. Vice President          | : Bovieo Poukai Duo       |
| 3. General Secy            | : Imtiyapang              |
| 4. Asst General Secy       | : Boketo Kiho             |
| 5. Finance Secy            | : Akherio Lazio           |
| 6. Secy Education          | : Muphatho Nyuthe         |
| 7. Secy Social & Cultural  | : Dievi Yano              |
| 8. Secy Publicity and Info | : S Shilukaba Longchar    |
| 9. Speaker                 | : Amonbo                  |
| 10. Auditor                | : Holuvi Chophy           |

Sentong nungsa Pochury Students' Union aser Mokokchung Town Baptist Arogo Youth choir-i ken ajanga shilem agi.

NCRC Mission director, Rev. Dr Imchayanger-i tang tasen shimba office ketdangpurtem meshiteta sarasademja liasü.

Iba sentong dak alia 'Entertainment Nite' sentong ka ayonga agiogo, kong kaketshir telongjem 17-i shilem balala agiba den külemi Dreams Unlimited-ia temeja shilem ka agia liasü.

## Lokti nung yimjung asoshi inyaker kaka asütsüla: Laisam

**Tzurangkong, June 01 (TYO):** Tanü Arunachal Pradesh, Legal Metrology & Consumer Affairs, Parliamentary Secretary, Laisam Samai-i Naga nungeri kaketshirtem dang yimjung osang abener kaka küma Naga nungeri lokti aser state atema langka tajung inyaksü asoshi ajungshi.

Laisam Samai ya 27buba NSF lokti senden nung Brehostibarnü tongti tesemdang liasü. Pai sentong nung o jembidang ashiba agi, loktiliba aser Northeast nung yimjung bener arutsübaji kaketshir ka mapa lir, aser iba nungji ajaki shilem agütsü kanga tongtibang lir.

Paisa kaketshirtem dang northeast nung lokti balala tsü ngda telema doktsür iba tesem nung yimji yimjung bener arutsü asoshi

inyaksü ajungshi.

Anepdang sentong nung NEHU-Shillong, Philosophy HOD, Dr Xavier Pfokrehe tongti o jembir liasü. Pai conference indang omen 'Amelioration' nung ajemdaker jembir.

Pai ashiba agi 'amelioration' tetezü shisatsü aser libaliro nung asüngsashiba lir. Lokti nung temelenshi nüngdakattem bushiteta item nungji temelenshi bener asoshi NSF-i lenmang bushitsüla, ta Dr Pfokrehe-i ashi.

Paisa, asen lokti nung ochimashi, ozü ng alema inyakba maparen balala agi sünga aliba aser libaliro nung atsü ngzüka aoba atema temolung shiranga bilemba lemsatop.

Iba dak sendakba nung pai NSF lenirtem dang tesem tila ka nung dang temolung magütsü tesem tuluba nung shisatsü

angazüksü asoshi ajungshi. Pai ano kaketshirtem dang nisung mesüka alitsü angazüksü, sobaliba jangajaa metettsü aser yimjung meimba nisung kaka asütsü asoshi tongtibangsa ajungshi.

Iba dak sendakba nung pai, Naga litsütem nung ali nungi adokba rongsen jenti lir, ajüsüka shisatsü agi matongba agi itemji rongsen mekümdaktsüteter, ta tesasaba olen ka ashi.

Paisa, Naga nungeri asentenshinüra, nüburtemi tajungtiba akumtsü nüngdak, shisadangtsü nüngdak, meyipa repringshitsüla, iba den külemi kin aser lokti telemsa bendangba yimya indoktsüla, ta ashi.

Anogo asemnü senden tembangba anogo anepdang 'NSF-i koma ser Naga nungeri tarutsü tia tajungba ka dangi anitsü', iba onük nung o lemtepa liasü.

## Dimapur DC-i Greener Dimapur project tenzüksüogo



June 01, 2017 nü City Clock tower, Dimapur nung Dimapur DC, Kesonyu Yhome-i Greener Dimapur project tenzükja süngdong ka temtsüba sülen tzu aanba noksa nung angur.

**Dimapur, June 01 (TYO):** Dimapur yimti temerükba akümtsü nükjidong nung Brihostibarnü Clock tower, Dimapur nung Dimapur Deputy Commissioner, Kesonyu Yhome-i "A Better Dimapur" project tenzüksüogo.

Iba project ya Dimapur Municipal Council (DMC) den Team Green Dimapur-i ketdangsüa tenzük. Iba project nung telemsa asemji- Greener Dimapur, Cleaner Dimapur aser Healthy Dimapur lir.

Greener Dimapur project tenzükja Yhome-i, iba project ya asen lokti nung terenlok alitsü asoshi lir aser terenlok otsü ka tenzüksü atema lir, ta metetdaksü.

Paisa, iba project ya ajanga

temelenshi bener arua Dimapur ya tesem tajung ka akumtsü imlar, ta ashi.

DMC office complex nung health Dimapur sentong tenzüksüdang Chief Medical Officer, Dimapur Dr. Vikato Kinimi-i, sensotemi amalitepa iba setong menungitra sorkar aser Municipal kijai dangbo nükjidong mataongtsü, ta ashiba den külemi nisung shiai Dimapur yimti tajungba akumtsü atema inyaksü ayongzük.

Tanep Naga Council Dimapur Tir, T. Bangerloba-i Christian Higher Secondary School, Dimapur nung Cleaner Dimapur tenzükja liasü.

CEO, DMC, Moa Sangtam-i, iba project ya yimti tiyong nungi tenzüksü, iba sülen shilem

lemsar DMC kübok ward ajak ayimjema inyaksü, ta metetdaksü.

Paisa, mezüngbuba shilem nung Church Road tesem nung inyaka jana indokba pongdang yutsüba den dokan kiburtem danga merükmejua alitsü indang metetdaksütsü, ta ashi.

Paisa, iba project takok angutsü atema nüburtemi shilem agitsüji kanga tongtibang, ta metetdaksü.

Iba project inyaksü atema DMC-i Team Green Dimapur den longjemogo, aser maneni tanga tentetema ayongsemtsü tebilemba lir.

Teinyaktetbatem asadanga sülen ang tanabuba shilemji taküm December ita nungi tenzüksü.

## Abhijit Sinha Nagaland CEO shimogo

**Kohima, June 01 (TYO):** magütsü tashi pai iba mapa Abhijit Sinha, IAS Nagaland abentsü, ta tanü Election Chief Electoral Officer Department sangdong ka nung shimogo, aser tetuyuba tasen ka metetdaksü.

## Legal Metrology & Consumer Dept., Phek-i sangdonger

**Dimapur, June 01 (TYO):** Society ajak dang parnoki Legal Metrology & Consumer Protection Department, Phek-i Phek district kübok consumers atema inyaker Voluntary Consumer Organisation/Consumer nung agütsütsü metetdaksüogo.



June 1, 2017 nü Government High School, Singrijan nung Hindustan Scouts & Guides atema Pravishika course indang anogo ka training agütsüba noksa nung angur. Iba training nung scout 109 aser guides 116 aden. Iba training ya Gnana Nirmala, Organizing Commissioner Nagaland den State Secretary-i ketdangsüa agi.

## UGC-i M.Phil aser Ph.D atema sangdonger

**Dimapur, June 01 (TYO):** magütsü metetdaksü. UGC-i Indira Gandhi National Open University (IGNOU) den State Open University kar nem 'Regular (full-time/part-time) mode' ajanga M.Phil./Ph.D. programmes (non-technical programmes) agutsütsü temelaba agüja lir, aser ibajia UGC (Minimum Standards and Procedure for Award of M.Phil./Ph.D. Degrees) Regulations, 2016 nung lateta aliba ama inyaker University tem aser UGC-i agizükba University tem dang lir.

UGC Secretary, Prof. Jaspal Singh Sandhu-i kaketshirtem dang distance learning mode ajanga University/institution temi M.Phil./Ph.D. programme agütsüba nung admission

## TDLSA-i inter school quiz competition ayongzük

**Tuensang, June 1 (TYO):** Tuensang District Legal Services Authority (TDLSA)-i "fundamental rights and duties" onük nung ajemdaker Tuensang jila nung 2017 May 31 nü quiz competition ka ayongzükka kaogo.

Iba tetoktepba nung Government Higher Secondary School Tuensang, Government Higher Secondary School, Thangjam, Government High School Chaba aser Government High School Hakushang nungi kaketshirtemi shilem agi.

Iba sentong nung SDEO Jongshimongla tongtibang tesemdang liasü.

Iba sentong nung o jembidang Jongshimongla-i department ajanga school ajak nung 'counsellor' ama tesayur kaka agütsütsü metetdaksü. Kaketshirtem taküm nung tibilemtsü alibatem ajanga soseta asüba aser ozüng alema maparen balala nung shilem agitsü aliba melena counselor den counseling agitettsü, ta laisa ashi.

'Right to education' onük



nung jembidang lai ashiba agi, department ajanga kaketshirtem nem yangkhu taret bendaksüba nokdanga government school ajak dangi osang yokogo.

SDEO-i ashiba agi, kaketshirtem school-i aotsübaji khuret ka ama masü saka jangraa aotsüla, aser ibaji 'fundamental temeten' ka lir.

Lai maneni TDLSA puri government school tem dak rangloker quiz competition

ayongzükka akaba atema parnok tenüngsang agutsü.

Sentong nung okila-a jembidang Principal District & Session's Judge aser TDLSA mendenbuba Mayang Lima-i, linük temzüng ajanga nüburtem nem 'fundamental rights' agüja aliba shisem. Pai ashiba agi, nüburtem nem sorkar ajanga temeten agüja aliba kari danga nokdangra pa/lai constitution nung aliba ama High Court aser Supreme Court den

tongteptetsü.

Pai maneni linük ajanga nung Legal service tem; national level nung National Legal Services Authority nungi district level nung District Legal Services Authority tem tenteta aliba shisem.

TDLSA mendenbuba-isa quiz competition nung shilem agiba atema school pezü nem tenüngsang agutsü.

Quiz competition nung Preliminary Round, Passing

Round, Rapid Fire Round aser Buzzer Round ta liasü.

Tetoktepba nung Government High School Hakushang puri mezüngbuba jenjang nung takok angu asü aser tanabuba jenjang nung Government Higher Secondary School Tuensang liasü. Mezüngbuba aser tanabuba jenjang nung takok angurtem nem certificate den senpet 5000 aser 3000 agütsü.

Government High School Chaba aser Government Higher Secondary School Thangjam nungi shilem agirtem nem certificate den Consolation prize sen meyrjang anana agütsü.

Tuensang, Judicial Magistrate 1st Class aser TDLSA Secretary N. Kano-i district ajanga nung District Legal Services Authority Tuensang-i inyakba mapatem metetdaksü.

Iba sentong ya Panel Lawyer TDLSA Antimangyang Chang lenisüba kübok aka aser Tuensang PLV Front Office Hongsayemjong quiz master liasü.



Guwahati, June 1 : Brehostibarnü Dispur, Janata Bhawan nung Minister for Agriculture Atul Bora -i Assam State Agricultural Marketing Board Booklet ka sayaba mapang tangokba noksa nung angur.

## Assam aser Meghalaya na tsüingda Dhubri-Phulbari apu yakta yanglu tenzüksü

**Tura, June 1 (Agencies):** Tawa Northeast India nung apu talangtiba Dhola-Sadiya Bridge/Bhupen Hazarika lapokogo. Iba apu ajanga Assam aser Arunachal na sendaktepdaktsür. Maneni ano Assam aser Meghalaya na sendakteptsü asoshi Dhubri-Phulbari apu yanglu tenzüksüba, Road Transport & Highways & Shipping, union minister Nitin Gadkari-i sangdongogo.

Iba apu tassenba ya Brahmaputra ayong temdanga yanglutsü aser Dhola-Sadiya apu dang nungi km 4 agi talangba asütsü. Iba apu tasazük ya km 14 shi asütsü ta metetdaktsü.

Dhola-Sadiya apu lapokba sülen anogo isheka tejakdang

Gadkari iba osang sangdonga liasü.

Gadkari-isa ashiba agi, maparen teinyaktsü küm 50 shi anüingdaka alibatem BJP-i aniba sorkari küm 5 tsüingda nung renemtsü.

Iba apu tassenba yangluba nung sen crore 4000 shi indoktsü imlar aser iba tesem nung nüburtemi mapang talanga nungi aginüa aliba ataloker asütsü. Ano iba apu ajanaga senzisenpongba nung ghonda 6 shi agi tajemba akümtsü. Taoba mapang tem nung Meghalaya nung Phulbari aser Assam nung Dhubri tesem na tsüingda motor agi aniba rong ajanga senzüa liasü aser tesem ka nungi tesem ka atongtsü asoshi ghonda 2.5 nung 3 tashi agia liasü. Iba project ya Japan

International Cooperation Agency (JICA)-i senotsü teyari agüja yanglutsü aser iba küm August ita nungi yanglu tenzüksü imlar.

Iba apu ya km 2 shibo Meghalaya nung yanglutsü, saka ali dak sendakba nung deputy commissioner den mejembitetba ajanga osang tejanga mongiteta lir, ta osang ajanga metetdaktsü.

"Iba ya onok asoshi kanga osang tajung lir aser iba ajanga local tem rongsenketsüing nung tali renloktsü. Maneni iba apu ajanga Meghalaya aser West Bengal na tsüingda senzüba mapang tajemba akümtsü. Apu yangluzükba mapang tashi nungbo AMPT lenmanga renemer alitsü imlar," ta Phulbari nung alir Uttam Das-i ashi.

## ISI pur Assam-i aitba osang angazüka police kümdangshir

**Guwahati, June 1 (Agencies):** Intelligence Bureau ajanga Nepal len nungi Assam-i ISI pur agent tem aitba osang agütsüba sülen Assam DGP Mukesh Sahay-i district ajak nung police tem dang kümdangshia alitsü asoshi metetdaksüogo.

Home department aser police tem nem Intelligence Bureau ajanga osang agütsüba nung ano linük nung ISI agent tem maneni mapa inyaka aliba dena metetdaktsü.

Tawa Intelligence Bureau ajanga Union Home ministry

nem osang agütsüba nung parnoki ashiba agi, ISI puri yariba telok Hizbul Mujahideen pur noklang aika India-i aitsü asoshi kiyonger linük nung jenoka lir. Parnok ya Indo-Nepal arrtsü len nungi aitsü asoshi merangdar. "Kiralongrartem India-i aitsü asoshi kanga merangdar aser parnok Northeaster tesem len nungi aitsü asosohi tali rangloker inyakdar," ta IB osang ka ajanga metetdaktsü.

Assam ADGP (Special Branch) Pallab Bhattacharya-i ashiba agi,

parnoki Ib pur osang kanga tongtibangsüa agizükogo.

"Assam kübok district ajak nung police tem nem iba osang agütsüogo aser temolung melemi bilemba tesem ajak nung meita aoba sentong agitsü asoshi metetdaksüogo," ta Bhattacharya-i ashi.

Security sepaitemi taoba küm ana tsüingda nung jehadis 50 shi puogo. Parnoki maneni state nung jehadi camp tem amakba den külemi parngbong aser injanga aika iba mapang nung puogo.



Agartala, June 1: Agartala nung tzunglu kanga sashia aruba sülen lenmang metsüingbanger aliba nung tetsür ka tanur ajunger aser kaketshir ka ta süidang tangokba noksa nung angur.

"FORM IV"  
(See sub-rule (2A) of rule 5)  
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

**IN THE DEBTS RECOVERY TRIBUNAL : AT GUWAHATI**  
(The Tribunal of Assam, Nagaland, Meghalaya, Manipur, Tripura, Mizoram, Arunachal Pradesh & Sikkim)  
APSARA BUILDING, 1st FLOOR, DR. B. BAROOAH ROAD, GUWAHATI-7, P.O. - ULUBARI, ASSAM.  
ORIGINAL APPLICATION NO. 119/2017  
State Bank of India .....Applicant  
- Versus -  
M/S. A. A. SHOP AND OTHERS .....Defendants

To,  
**1. M/S. A A SHOP**  
Murgi Patti, N L Road, Naga Bazar, Dimapur, Nagaland-797112.

**2. SMTI ABOLI ACHUMI**  
(Proprietor of M/s. A A Shop)  
Daughter of Khevihe Achumi,  
House No.18, Zealingrong Village, Ward No.18,  
Army Supply Road, Dimapur, Nagaland-797112.

**3. SRI SANJAY ROY,**  
Son of Amal Roy,  
House No.66, Zeliangrong Village, Ward No.18,  
Army Supply Road, Dimapur, Nagaland-797112.

Sen 13,35,585.75 (sen lakh terasem, meyrjang semerponggu, noklang pongu ser sen tirponggu ser poisa neterponggu) sentsüh maotetba atema applicant-i nenok anema Recovery of Debts Due to Banks and Financial Institutions Act, 1993 kübok application U/S 19 agütsüogo (application den kulikaktem dena). Iba Act section 19 nung aliba sub-section (4) kübok nenok dang item, ya metetdaktsür:-

(i) to show cause within thirty days of the service of summons as to why relief prayed for should not be granted.

(ii) to disclose particulars of properties or assets other than properties and assets specified by the applicant under serial number 3A of the Original Application.

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties.

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the Original Application without the prior approval of the Tribunal.

(v) you shall be liable to account for the sale proceeds realized by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Debts Recovery Tribunal, Guwahati on 29.06.2017 at 10:30 A.M. failing which the application shall be heard and decided in your absence.  
Given under my hand and seal of the Tribunal on this the 22nd day of May, 2017.

**By Order of the Tribunal**  
**Registrar**  
**Debts Recovery Tribunal,**  
**Guwahati**

## Sukhoi-30 pilot ana tasü mang ngutetogo



**Guwahati, June 1 (Agencies):**

Sukhoi-30 aircraft pilot Squadron leader D Pankaj aser Flight Lieutenant S Achudev na süogo ta Indian Air Force ketdangsertemi metetdaktsü. Pilot ana tasü mang ya ngutetogo aser Assam nung air force station-i bener aruogo. Osang ajanga ashiba agi, technical tsütsü timtem aliba ajanga dena

tayimtsü nungi 'eject' mesüteti tayimtsü den külemi tsükok. Tena kanga mejungi yiru aser iba ajanga asü, ta metetdaktsü. Sukhoi-30 tayimtsü ya May 23 nü Tezpur Airbase nungi km 60 shi pilar tsükok. Tayimtsübo May 26 nü ngutet saka tsüingsang majungba ajanga pilot tem bushitsü asoshi anogo atsüzüka liasü, ta osang ajangasa metetdaktsü.

## Sen 2000 magütsütetba atema tetsür ka tepset

**Guwahati, June 1 (Agencies):** Guwahati kübok Kamakhya Nursery tesem nung May 28 nü tetsür ka tepsetba ken o dak sendakba nung aitsüa alisangji bushiteta puogo. Tetsür la yagi sen 2000 magütsütetba atema Bapukan Ali-i la tepset. La tasü mang ya local temi May 28 nü la takdang nungi ngutet.

Police-i Bapukan ya Kamrup District kübok Agyathuri tesem nung par

kidang apu. Pai police matsüingdang pa la takdangi pai taoba mapang nung la nem aputsüba sen 2000 meshi ao ta nangzük. Lai pa nem sen magütsütetba ajanga pai la tama tashimiyim agi raksatsü aser iba sülen süng ka bena arua tepset ta nangzük. Iba sülen pai la phone aser television aouya bener ao aser TV-jibo tangra ka kidang toktsü. Bapukan ya ACP Pranjit Duora-i anir police telok kati apu.



# TIR YIMYIM

## YIMOBILEM (EDITORIAL)

DIMAPUR FRIDAY, JUNE 02, 2017

### NAGA LIMA TIA MELENSHIDI

- P Among Aier

Nagaland Baptist Churches Council (NBCC)-i Clean Election indang yimyim ayimoktsür Naga lima tesem balala nung Arogotemi iba dak sendakba mapa kanga meranga inyaka arudar. Nagaland nung election inyakyim nung ochimashi agi sünger aliba aser Naga nungertemi metetsümonga, odiodia election nung tim masüba maparen inyakba atema tebilemtsü bena Arogoi iba mapa inyaksü tenzük. Nisung kati election nung ochimashi mapa meinyaksü aser ozüng nung lateta aliba ama pei indang vote ji peii dang agütsütsü atema Clean Election osang sangoktsürtemi tongtipang süa ayongzükba arudar. Mapang ka India linük kübok Bihar state nung sorkar dang 'gunda raj' ta tenüng jaloktsü. Tetezü, iba state nung ozüng alema inyakertermi election nung tashiyim aser ochimashi ajanga takok anguba aser candidate pusemertemi tashiyim agi vote agütsüdaktsüba aser süpokrem agüja vote meshiba sülen sorkar küma pei sünütsü süa sorkar ketdang süba atema yamai tenüng jaloktsütsüsa aküm. Iba mapang Bihar nung ozüng maliasü, sorkar yimsüsürtemi kechi junger ta bilem aji dang inyak aser külen parnok pusemertemi parnok ajangzüksü aser parnok aginüba dang inyakba ajanga state nung tanüngbapurtem alitsü mejungi tensa ka ajuru. Kasa tensaji, tanü asen Nagaland nung asenoki ajurua lir. Hao asen state sorkar yimsüsürtem ajak majung mesüra parnok ajaki tashiyim amshia election nung takok angu ta asenoki maitsür mesüra tai metongloksür. Ajisüaka, asenoki election merüka magiba, election nung süpokrem meshia agiba, election nung vote ayokba, election nung yimteni ozüng tesashi yanglua nübo ka dang yariba inyakyimtem ajanga tanü asenoka Bihar state nung 'gunda raj' amaji mesüka kümogo. Reprangdangra, tanü asen state sorkari pei nübortemi adokba ola mangashir aser taginübatem metongtsür. Asen state nung ozüngbo tenüng atema lir saka tepo mali kümogo. Sorkar department, office ajak nung ochimashi, sentsü alirtem aser yimsüsür den tesentaktep tajung akartemi dang mapa-a angur, tanga tajangzüktem-a angur aser tanüngbapurtembo talitsü mejungi lir. Tesem ajungalen nübortem sorkar anema nemnemteper, terenlok mali, wadang ajak nung metokmeperi agi süngogo saka iba ya asenoki election merüka magiba ajanga adokba lir. Iba tebilemtsü ajiteta tanü Arogoi Tsüngrem tenüng nung Nagaland merüktetsü atema Clean Election sentong atonga inyaker aser asenok nem tesayuba balala agütsür. Ajisüaka, asenok Naga nung tangatetba memelenshi tashi, mulungsentsü memelenshi tashi, atangji tesayubatem angazükba mapa küma meinyak tashi, Nagaland tensa kasa dang asütsü. Arungma, taruba election nungjibo asenoki Tsüngrem tenüng nung ochishia shilem agitsü temulungtetba yudi. Shirnoki election shia tangatetba shitak nung ochishia shilem agidar, nenoki tangartema ajungmesotsü merangangma. Election nung ochimeshii inyaka arurtemia tarutsü asen Naga lima tia dak rangloker aser Tsüngrem akhümtsüsuba Khristan tajung ka ama, taruba election nungjibo ochimashi mapa kecha meinyaksü, pei temeten vote ji senti ta angateta agütsütsü, tangar tenüng amer vote magütsütsü, candidate nungi sen meshia magitsü, candidate nungi pei nija mesüra kibong atema langkaka imlaa meyaritsü, tashiyim mapa meinyaksü ta mulungtetdi aser ibaji mapa küma inyakdi. Yasung nungi Ao Baptist Pastors Fellowship-i Ao Baptist Arogo Mungdang kübok aliba arogotem ajak nung ghonda 7000 sarasadem yinzü tenzükogo. Anungji Aor-Aotsür ajaki iba sentong nung shilem agitsüla aser tema tazütsü atema dang masü saka asen mulungjang taroktiba nungi angateta, asenoki election mashileni angateta aliba melenshitsu aser Naga lima nung Clean Election atema Tsüngrem dang nungi teyari meshia sarasademtsüla. Sarasadem nung tashi lir ta tangatetba nung iba sentong tajung atonga inyaker. Ajisüaka, mapa medenra tamangji amajok, anungji asenoki tema tazütsü atema sarasadamba dang masü saka chichiba asen temulungjang taroktiba nungi angateta asen Tulusang Tsüngrem dang nungi teyari aser tangatetba meshitsüla aser sangküm election nungjibo asenoki ochishia mapa agi sayutsüla. Aji asünungdang, asen Naga lima tia melenshitsu aser tarutsü putu jenjang tajung asenoki yangertetsü.

## OLEMSABANG

### MOATSÜ-MONG ASER TSÜNGREM-MONG AMONGBA YA TEMENEN ASÜ ?

- L.Kika Pongener, Aoyimküm, Dimapur.

(Taoba adok nungi...)

Anungji tanü asenoki Moatsü-mong aser Tsüngrem-mongji amungyonga otsüla oboula nungeri amungba yimya nungji masü, saka Khristan tamangba yimya nung tembar-adianu jaoka pei pei kibongi akok, mesura lokti tentet balala-i pei pei tashi yari achi-ajemtsü tajungtiba renemer sentong tajung yanglur pelatepa amungba nungbo kecha aibelen malitsü sudi ta bilemer. Aser yim yim pei pei akok sentong tajung yanglur tsürabur mapang nungi akang-aksutepa, anja-jaoktepa lia aruba tembar yimtsüngtem jaoker, akhi limapur tsüngrem kulemba melena tanü aseni amangba Tsüngrem dang temoatsü meshia aser tenungsang aguja sarasademmer yar-tsüngsangtepa sobaliba asaya tapu balalaji asaya-a pelatepa amungba nungbo kecha tashishitsu aser aibelenbo malitsü sudi ta bilemer. Sobaliba ya akhidang koma liasü yamaji tang alitsüla, mesura akhidang koma benshia aru yamaji dang akang-akanga benshitsüla ta kecha talenba ka maka, putu tensa den apet tajungba tajungba asüng-sashia melenshitsu akok. Tanü asen putu ya sobaliba yimsoshiba mapang ka lir, aser iba yimsoshibaji kechi koma lia aru yamaji dang alitsü ta masü, saka sobaliba tamajungtem intoker putu tensa den medemdanga tajungba asüngteta yanglushir tajungtembo wazüka ayutsüla. Aser asenoki asen sobaliba (Traditions and Culture) ya tamangba aser tekulemba (Faith, beliefs and Offering) den meyoktepa mangatetsüla aser meyoktepa mebenshitsu kanga tongtipang.

Anungji Moatsü-mong aser Tsüngrem-mong benjong amungbaji tai masü, saka benjong amungdang yi saa-yur ajemba, kimakba, salepsaria lidipudia talitapong pelatepa longsotepba, item sobaliba libaliro yimya tamajungtem jaji menendaktsürba dang ta angateter. Tanü asenoki khristan yimsu agizüker kulen-a Christmas aser Küm tasen benjong amunger, aser iba Christmas aser Küm tasen benjong amungdanga yamala yimya tamajung, libaliro tamajungtem yi jemer, lidipudia, salepsaria mungra aser tongtipangsa hindu nunger sobaliba ama kaket bomb poktepa mebenshitsu yimyayimkotem benshia mungra, ajia kusa topur tamajung dang masü, saka aibelener asütsü. Aji oda, iba Moatsü-mong aser Tsüngrem-mong amungba yabo kecha aibelen mali amai bilemer. Anungji Moatsü-mong aser Tsüngrem-mong iba benjong ana yabo mesamai wazüka ayutsüla aser amungtsüla ta ku tebilemba iba ocet ajanga tazüngertem den lemsateper. Ajak dak alaka asenok ajaki kangasa tongtipang sua angatetsübaji Moatsü-mong aser Tsüngrem-mong amungtsü meji yimer ajunga khangtepa saru saruba, temulonger tenla saruba, iba ama tentet ya khenyongi mebenshitsu, kechiyong iba ama tentet ya ajanga alima rongsenketzüng nung kanga dang telungi ludaktsür. Ano aji tang masü tongtitesemdanger aser tetushi tejaoker jaoka parnok nungi senotsü tenla tulu yimla-a benjong ayongzükba, iba amala tentet ya joko mebenshitsu. Shir teloki ayongzüka benjong mungdir par tashi yari ayongzüker pelateptsüba dak alaka talitapong pei tashi dak alia mayongzüksüla. Moatsü-mong aser Tsüngrem-mong meji alima sensak tia-i aidang nungjibo benjong-ang ayongzüka mamungtsüla. Benjong-bentsü mapangji nubur ajunga asoshi tepelatsü mapang ka lir, anungji benjong longsoa pelatepa amungtsü meji shinga nema jurila timtem magutsütsüla, kokrabangla shi ango taluposa mamshiyongjia süngo tajung renemer amungyonga, otsüla oboula nunger benjong-bentsü yamai munga arua nii... ta lanu asensortem nem metetdakja pelatepa mungra aji agi teperi, saka shi ango taluposa amshia chidiyungditsübaji tongtipangba mekümdaktsütsüla. Aji oda, Moatsü-mong aser Tsüngrem-mong munga aruba yimya nungji Aor-sa asüyongjia among-süngküm balala asünungji tsükong shia aser yimtsüng shia terara tepila alitsü akok, ajisuaka tongbenji-bo kusadang asünung, iba tangatetba nungji rangloker metongshia azüngtsü mepeshir. Ano kari iba Ocet nung ya o semlok mesura temetongshitsu aser temelenshitsu kar reprangteta metongshia zülura ajia asenok arok kulem asoshi tangazüksü lesson tongtipang asütsü.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Asen tetsü tebou tamang tir Tsüngrem tenyar ajanga teyanglur Tsüngrem den jembiba, aser alima Tsüngremtem den arasentsür kar ajanga jembiba tapu ana indang tatsüka rasaa shiner

- R.Imkong Lkr, 4th Mile, Diphupar: Dimapur - 797115

(Taoba adok nungi...)

Aser ano jembiba aruba agi Alu tasen lepoka achidang par Tsüngrem menden memetet-isa raksatsü, anungji alu Tsüngrem tu ain adoka par yimdaki parnok sülen anidaka atoktsü aser mashi mapang ka nung, oda anüngdang mapang süale, aonung mapang süale ki-jensa rongdoktsü aser yipru mopung tesashi koba dang Tsüngrem mopung "Cyclone" ta ajar, iba jagi ki-jentem kanga mejungisa raksatsü ta otsü-i ashir. Aser ano aki mapang leptepe tsüngtepe alitang pei, pei yim Tsüngrem mesüzüka külemasa liasü, aser kodang koba mapang ka nung par yimer tu tangar kin mesüra yimtsüng kar den tongpang rarai odir, idangji par yim Tsüngrem tu anidakasa aru aser tsüngak mopung tulu ona-a tongpang rara nungtusa yaria parnok nem takok tulu ngudaktsü aser parnoki tangar mangko aikasa lepzüka atang, iba mapang parnoki tangar yim tsüngremsa lepsem ta otsü-i ashir, aser parnoki alepba temangbo roker tang ser nung tekolakbo roker ser ka-sa züngtet ta ashir. Yamaji asen tetsü tebou mapang atalokba ama temeshi lai otsü den kanga mesüktepa atalokba angur aser angashir. Aser ano asen tetsü tebou mapang nungbo mojing tang Tsüngrem tasa jaa aru, aser iba Tsüngrem jagi maparen aika nung timtem teraksa jentisa bener arutsü saka ano kasa Tsüngrem tu peladaktsüra pai kanga sakloksa aküm aser temoatsü jenti renasa kümdaktsü ta otsü-i ashir. Yamaji temeshi laishiba nunga asen Tsüngrem ya mepeladaktsüra takoksa aser tamakok jentisa atalok, saka pa peladaktsüra idangji azükaru, temoatsü nung jenti renlokasa ao ta shia angur. Yamaji pai saklokbabo sayatenya tulu agisa yari. Yamaji Israel purtem Tsüngremi jakdaka yariba angur, pai rüjeb lung tulu anüng nungi aludaktsü, aser Azeka nung Israel chirtemi nok agi parnok Tepsetba dang nungibo rüjeb lung agi südaktsüba timba liasü ta shia angur. Yihusua 10:11. Aser ano Yihusua 24:12 nungjia yamai shia angur, aser nenok lijak mesüra nok mamshi-i nenok tsüngdang neungi Amor nung chuba ana tena parnok aridoktsü aser ni nenok jakdangi nati yok ta shia angur. Yamaji asenoki asen tenük agi Tsüngremji mangur aser mojingjia mangur, saka tena pronglai jakdaka mapa tajung mesüra tamajung jenti inyakba temeshi lai ajanga angur. Yamaji mojing ain tashi agi Yisu-a atitangba angur. Mathi 4:1-10 Saka mojing shibai mapa tulu inyaker, saka tatem nungbo pai asen tanela tekümtet magütsüteter ta shia angur. saka tatem nung ajak külakoktsüsang mojingji mi aser mitsüktsü mozü kangla nung, kong iba shiruru aser parnok mangli sangwali teti tatem makai kangshia alitsü indang J.Adok tapu 20:10 nungji shia angur.

Aser ano yangi olen ka shiner, oda asen tetsü tebou mapang Arasenba aser tanü tamangertem rongnunga kari shiner "prediction" iba tapu ana ya terabo mesükteper ta bilemer. Arasenba ya asen tetsü tebou mapang nung "Aosangpongpi" ta jaa liasü, item Arasener mesüra Arasentsür ya kanga puzünga "very rare" liasü. parnok jagi asülen-i par tanela oyaa liasü, iba dangji "tamangi aoba" ta jaa liasü. Tetezü Aosangpongpi tu mapang tatsüka atema shi nung süadoker, aser pa mapang matong tashi tasüba tu shia maru-isa liasü. Iba mapang nungji Arasentsürla tanela tu asü lima nung asürtem tanela den ajurutepa alir, aser nisung karbo jok süa doker anogo ana asem tashi tasügangji mereptaka alitsü, aser tangu-a khen agi mesashi alitsü, saka sür aliba temang tu sentsübo meremi alir aser iba mapangji Aosangpongpi tamangi asü limai aoba tu asürtem tanela den jembitepa pa mesüra la ya ano mapang tatsükabo lir-ang yoktsü ta shia sür aliba tanela tu anir arudang, joko sür alisang mesüra sür alila tu tangu tera sashia arutsü, iba sülen tenük lapoka ano tanaben akümlir rongnung densema liyonga aoba otsü lir. Aser shiba tamangi asülimai ao, la tu asülima nungi meyipa arudang la jak tu asentzü ago senpanger saaka ni tzürar, ni tzürar tasa shia aru ta otsü-i ashir. Tetezü, Aosangpongpi tamangi asülimai or meyipa shilangtang tu lemang talang nungi kanga anibelega jajaba agi kanga tzürasetasa shia aru ta ashir. Aser nisung kar sür joko küm pungo, terok aliba nisungtem aser karbo joko sür küm ter tema aliba nisungtem tenüng tu tanur kar asoa nungtenger jatsübatem tu joko aier, aser asangur kümer aliba mapang, Aosangpongpi shiba asü-lima nungi meyipa shilangtang asür tanelatemi ozü kinungertem pa, pa tu aser lar kinungertem tua komasa liteptar ta asüngdangba tu langzüa parnok aser par kinungertem tu kangasa junga liteptagi ta shia osangtemsa lemsatet ta ashir, iba den parnoki nenok nem saalam yoker tasa ashiba tu metet-dakjsa liasü ta otsü-i ashir. Yamaji asü lima nunga aki mapang akümlitang apuni liyongaaruba amatusa jangratema külemisa ki tilala nung temenungratsüka liteptagi tasa akümlir dang rasaa ashitang kangasa menungrasetasa angaa liasü ta otsü-i ashir.

Yamaji akümlirtemia karibo pungmang nung pungmangasa liasü ta otsü-i ashir, aser iba pungmang pungmangba jagi kuli tejangja ta Arasentsür tamangi aoba indangji jongkai atoka sayur. Aser akidangbo nisung kar süra tebour atema anogo terok aser tetsü atema anogo pungo ta tzü-in azük nung sadem temer iba mangungji tasügangtemjisa ayu ta otsü-i ashir. Aser nisung karbo anogo asemnü puba nung khen-sa shia aru ta asen tsürabour otsü-i ashir. Saka iba shia aruba anogo nungji khen arakzür tang ashi ano tanaben amuzükasa ao aser joko tanaben kodanga mesaak ta otsü-i ashir. Tanü asenok tamanger rongnung kari mangdangi aor aser mangdangi aoba mapang nungji item purtem ajanga Tsüngremi kechi ashir aser pa taginüba kechi itemji nübur temdang ashir. Aser ano nisung kardangbo na taküm yimya yamai malitsüla ta ashir, aser nai ano memelenshi-i lira na taküm lendong tulu nung lir tasa ashir, aser ano nisung kar dangbo na iba tashidak agi kangshir, anungji iba mozüji achitsüla ta ashir, aser kar dangbo ne temang iba nuuungji langka raksaa lir aser ibaji meyanglu tashi na yamaisa kangshia alitsü t ashir. Yamaji tamanger rongnung kari mangdangi aoba aser asen aki tetsü tebou mapang nung tamangi aoba anaji terabo mesükteper tasa bilemer. Saka ana tetsüngdaji balala lir. Aser ano asenoki pungmang pungmanger aser pungmang nung anguba, jembiba karbo Tsüngremi jakdaka asen tang tarutsü mapangtem nung kechi ataloktsü ali, aji jilia "advance" nung metetdaksüba mapatem lir aser item amala mapatemji atalokyonga aotang-ang asenoki pungmangtem tu yimtang arua rajemer. Aser ano asenok karibo tiyar-i jembir ta-sa jembiba aru. Anungji asenok aikati pungmang ya kechi atema pungmanger aser iba pungmang tetezü-ji kechiar aikati ratet-tsü makoker, saka mapa aser mapang agi atalokyonga aotang-ang rajema arur. Yamaji asenoki iba pungmang pungmangar anaji aiben mebendangteter. Saka mangdang yabo kangabo memenu-i mapa agi chichia atalokyonga aor ta metetdi. Saka pungmang pungmangba yabo aiben asang-sang nung mataloker ta jembiba aru. Iba kasa-ji kü taküm nunga aiben atalokyonga aruogo.

Ni zuluba nung kari yabo tera mangateter mesüra tera tashi-shitsü lir ta bilemra, yimlibilema kü nem meyipa agüjangma aser tarutsü mapang nung melenshitsu tazünger ajak dang mepishir.

## ANOGO ABEN TSÜNGREM DEN

### TESÜLEN ATSÜNGBA TEMAITSÜ

Ne temelaba benshitsu ni ilung aser menua mali.

- T. Ken 119:60

Tsüngrem ola angashir asen taküm nung tashi angaba tanela ketdangsuba lenmang tajungtibaji "ilungbaji" lir ta tanü Lai agi sayur. Ilungang, aser temenu. Telemtetba ka makai ajangshibaji kecha memetet ama ka dang lir. Aiben nisung aikati sentep ka nung mesüra asentenshi sentong ka nung tanela nung tajungshiba angur aser telemtetba agir. Tsüngrem nem bendanga agütsür ta kuli asür saka kodang tajungshiba tanela tu mokongdaksür temelenshiba kecha mesayutetti akümer. Kodang Paul temulung meyip, idangyongjisa Khristaji Kümtetdakba ta sangdong.

Nai tesülen meyipba aoba tashidakji koktettsü akok. Kodang nai tamajungbai "masü" ta ashibaji magizükliir, Pai ashiba, "hao" saka tang masü ta ashitsü. Kodang nai anogoshia Kibuba den endoktsü mulungtettir, ibaji tanü inyakang. Nai kodang ter shilem agütsütsü taruba ita tata, aji tang inyakang. Satani tekülak agi ne asungji kodanga marui kümdaktsütsü. Anungji asenoki mapa ka inyaktsü akok. Kodang ne dak kongshidir, idangyongji inyaktsü lemtetang kechiaser nai ilunga tashi angaba shiaji nai ne lemang nung teti takok angutsü aser iba takokji teti alitsü. Merangji merema alidang ajenang. Kodang soruji (shape) yangluadokdir kecha agia aji majenshitsu; meyipba bener marutsü.

Na ibai nüngdak: Kibubai ne mulung nung kongshidang ne teinyaktsü ajak zülutena yuang. Ibaji tanü nungi inyaktsü tenzükang. Tajungtiba takümji nai tang alitsü akok.

Oba, nai tanü ajadang, ni ilunga langzüksü yariang. Amen.

## North Korea lenir Kim Jong Un-i Lai O tekong ana tsübur: Sen. Lankford



Washington DC, Rayburn House office building, Capitol Hill nung Sen. James Lankford-i International Christian Concern's policy anogomung nung jembiba noksa nung angur.

**Washington, June 01** "Ni iba atema kanga (Agencies): North Korea lenir, süngmanger. Ni iba ya ajanga Jong Un-i Khristantem nisung süngmanger, kechiyong meyrjang aika tepuokdak yua, (Tsüngrem o lemsapa) Kim reshikangshia tepsetogo, Jong Un aser par yimsüsübai ajisüaka paia Lai O tsübur, ta tsübur," ta Lankford-i ashi.

Sen. James Lankford-i ashi. "Iba kaket nung aliba otem atema ni shisadanger aser iba kaket nung aliba otem agi parnok tsübudaktsür," ta paisa ashi.

Alima nung Khristantem tamajungba reshikangshiba linükji North Korea lir. Congressional Prayer Mathi 22:37-40 azüngba Caucus co chairman, Lankford-i, "Ni iba Laishiba amer sabangi atuba ya ni asoshi jangratemtsüka lir. Ni kasa ya North Korea nung inyak nungbo timtem ajurutsü," ta ashi.

North Korea nung linüki yangluba Tenlakitem lir, ajisüaka ibaji alima dang par Communist linük nung tamangba yimsü kecha menokdang ta sayutsü atema dang lir. Khristan yimsü aser tanga tamangba yimsütem benshibaji North Korea nungbo memelar.

Iba linük nung mimshia Khrista dak amangertem aika puogo aser labor camps-i yoka reshikangshia tepsetogo. 1948 küm Kim yimsüsüba tenzükba mapang nungi tenzükba tepuokdak alir nisung meyrjang aika tepstogo. World Watch List mezüngbuba jenjang nung North Korea lir.

**OLONG PAITEP # 4438**

1		2			3				4	
					5					
6										
					7			8		9
10						11				
		12			13					
	14							15		
16										
					17					

**TIPIEN**

- 1. Tim / Ochi - (6)
- 5. Kilem atongpa yin - (6)
- 6. Shiruru tila ka - (4)
- 7. Nüktzü alu - (4)
- 10. Kimong ana tasazük - (5)
- 11. Kibong yongsük - (5)
- 12. Mulungsentsü tulu - (4)
- 15. Mi apudak tesem - (4)
- 16. Kolenkoshiba - (6)
- 17. Temoatsü meshiba mong - (6)

**LANGTSÜNGLEN**

- 2. Inyaka otet - (8)
- 3. Kidang masü / Yimdong - (4)
- 4. Iba ya sür külen - (3)
- 6. Naroküm / Akhüm agütsüba - (6)
- 8. Imdangi aru - (8)
- 9. Adenshi - (6)
- 13. Süngdong-lidong aliba tesem - (4)
- 14. T \_ \_ \_ k - (3)

**OLONG PAITEP # 4437 TELANGZÜBA**

**TIPIEN :**

- 3. Talak, 6. Tetenzük, 7. Lai, 8. Üngd,
- 9. Tzüdi, 10. Nüja, 11. Aok,
- 15. Sensaker, 16. Leper.

**LANGTSÜNGLEN :**

- 1. Sensa, 2. Meti, 3. Teti, 4. Lungmi,
- 5. Okadak, 7. Longso, 9. Taksep,
- 12. Ozümi, 13. Ekoj, 14. Aren.



**ALOKBA TARUBA NAGALAND ELECTION ATEMA ASALEDONG :**

Hi!! Tambu, arung chi chiyungdi. Kechi asütsü ta.... News paper dang zünga tekazü no!!!

Aya!!! Tantsü, tekorashima, taruba Assembly Election nungjibo ni sen sarua senzütsü lenmang sadema malitsü amai dang osangkakettem nung anogo shia adoker. Saka, ni aruya aliba election nungjibo kheni balakati asayatsü bilemdar, ibaji koma ta süra "Mobile phone ajanga candidate den kü Saving Account nung dang sen paikaji inokjang" ta dang ashitsü. Kechiba, ibala maparen nungjibo ni tai memenar asütsü adi!!!!



Lilir : SK, Dimapur

**TANÜBO NAI LANGZÜANG**

Q. Taküm 'World No Tobacco Day' (WNTD) amungba omen kechi liasü ?

- [A] Tobacco: deadly in any form or disguise
- [B] Tobacco - a threat to development
- [C] Tobacco kills, don't be duped
- [D] Tobacco: deadly for human development

(Taruba adok nung onoki langzüsü)

YASHI ADOK TELANGZÜBA : Asghar Farhadi



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**NAIA YA METETER MA**

**ICC CHAMPIONS TROPHY**

ICC Champions Trophy asayamung ya cricket ODI asayaba tapu ka lir. Iba asaya ya Cricket asaya tulutiba World Cup asayamung sülenbo ICC Champions Trophy asaya lir aser iba asayamung ya International Cricket Council (ICC)-i achayanga asayar. 1998 küm Knock Out Tournament ta ser küm ana nung khen asaya tenzük saka 2002 küm nungi tenzüka Champions Trophy ta melena asayadagi.



Kasa asayamung 'ICC Champions Trophy 2017' ya England aser Wales nung aJune 1 nungi 18, 2017 tashi asayatsü.

England nungbo iba asayamung tan agi asembebnuba asayar asütsü.

**SUDOKU # 3551**

4				3	5	6	1	8	2	9	4	5	3	7	
7	5	1		9		8	5	7	3	8	1	3	4	6	9
	6			1	9		3	9	4	5	7	6	1	2	8
8				3		2	3	4	6	3	6	1	8	7	5
1	5		6	4			7	6	5	4	8	9	3	1	2
3	7	4		2			1	8	3	7	5	2	6	4	8
	3	7			2		6	5	6	1	4	7	2	8	3
5	8		3	7			4	3	7	9	3	8	6	5	1
6			8	4		7	8	2	1	6	3	5	7	9	4

**TELANGZÜBA # 3550**

				3	5	6	1	8	2	9	4	5	3	7	
7	5	1		9		8	5	7	3	8	1	3	4	6	9
	6			1	9		3	9	4	5	7	6	1	2	8
8				3		2	3	4	6	3	6	1	8	7	5
1	5		6	4			7	6	5	4	8	9	3	1	2
3	7	4		2			1	8	3	7	5	2	6	4	8
	3	7			2		6	5	6	1	4	7	2	8	3
5	8		3	7			4	3	7	9	3	8	6	5	1
6			8	4		7	8	2	1	6	3	5	7	9	4

**OJANG LUTEP # 4046**

- PAMABO :
- NYAMEIKER :
- KASA :
- ARTANGI :
- YAKINBA :
- ANDG :
- NSHKEIA :
- AZÜKBA :
- YATYIMEM :
- ITSNDOKÜLA :

**OJANG LUTEP TELANGZÜBA # 4045**

TAJUNG DANG BILEMA INYAKER ASÜDANG KHEN KHENBO MEMETETI AIBELENA INYAKSEMER

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



**Aries**  
21/3-19/4

Tarutsü anogotem asoshi nai sentong yanglutsü tanü mapang tajung lir. Nai teshisadang melii mapa tenzükra tamakok alutsü südi.



**Taurus**  
20/4-20/5

Nai mapa tem meranga inyaker. Anungji tarutsü anogotem asoshi nai tanü shisadangang aser mapa inyakba nung yimya kar melenshiang.



**Gemini**  
21/5-20/6

Lokdi nung nai asayamenü yimya amshira tanü na ajangzüksü südi. Tongtipang nungdak jembiba nung nai shilem agitsü merangang.



**Cancer**  
21/6-22/7

Nür kibong asoshi bilemba ama nai nü mapa asoshia bilemang. Nü rongsen tsütsü tanü nai temolung agüjang aser iba ajanga na tajangzük angutsü.



**Leo**  
23/7-22/8

Nai nukjidong ka yur takok angutsü inyakba khen reprangdangang. Tanü nü jenjang kong ali, aji masü saka tarutsü anogotem asoshi inyakang.



**Virgo**  
23/8-22/9

Nü indang tarutsü anogotem atema nai züba-züba tebilem. Nü temang anepalutsü asoshi nai tanü temolung agütsüshitsü nungdaker.



**Libra**  
23/9-22/10

Anogoshia nai kechi inyaker aser koma inyaker, itemji bilemdangtsü junger. Mangatettep aliba mapang yimjung meyanglui mangatettepji madokdaksütsü merangang.



**Scorpio**  
23/10-21/11

Nü tejangraba ataloktsü asoshi sentong kar yangluang. Nai mapa kar nung takok ngunüa bilema alitsü, saka nai jelia sentong meyanglura takok mangutsü.




**Sagittarius**  
22/11-21/12

Nai tanü nü jenjang asoshi bilemstsü südi. Anibelem aser tetsübu nungi jenbua liang aser nai makoktsü nukjidong mayutsü merangang.



**Capricorn**  
22/12-19/1

Nai nukjidong tulu ayutsü meranger saka nü jenjang asoshi tali bilemra nai timtem ajurutsü. Tanü na anisungzük alitsü bilemang.



**Aquarius**  
20/1-18/2

Temelenshi arutsü asoshi nai mapa inyakba yimya melenshiang. Lokdi aser yimden nung temelenshi arutsü asoshi nai sentong tajung yangluang.



**Pisces**  
19/2-20/3

Aiben nü temolung kanga kara-a melenshir. Anungji tarutsü anogo asoshi nai bilemang saka telemtetba takang magitsü merangang.

### Justin Bieber, Miley Cyrus nunger Ariana Grande den külemi shilem agitsü



#### Manchester, June 1

(Agencies): May 22 nü bomb apokba lendong nung samartem tenüng nung June 4, 2017 Deobar aonung Manchester nung Ariana Grande-i kentenba sentong ka ayongzük akatsü. Iba kentenba sentong nung nisung 50,000 shi arua adentsü asoshi imlar.

Grande-i 'One Love' sentong ayongba ya Mongolbarnü sangdonga liasü. Iba sentong ya Manchester anasa Emirates Old Trafford nung akatsü, ta osang ka

ajanga metetdaksü.

Iba kentenba sentong nung la den külemi Miley Cyrus, Katy Perry, Justin Bieber, Pharrell Williams aser Usher nungeri shilem agitsü.

British musician Coldplay, Take That aser Niall Horan nungeria iba sentong nung shilem agitsü asoshi renema lir.

Maneni iba kentenba sentong ajanga "We Love Manchester Emergency Fund" atema sen aatsü. Iba sentong nung shilem agitsüpurtem ajaki parnok mapang tenlaba den

külemi senzusenpongba aser anenzükba nung sen indokba ajak parnok sasa dang anepalutsü.

Sentong ayonger rongnung Festival Republic nungi Melvin Benn-i Grande tasütait mapa atema la tenüngsanga liasü.

"Lendong atalokba sülen Ariana-i tejakleni arua kentenba sentong nung shilem agitsü asoshi imlaa meliasü. Tetsür chanu kati yamai tesüita mapa tajung inyakba ya actor ajaki reprangtetsü nungdaker," ta Benn-i ashi.

### James Bond actress Molly Peters alima nungi pilaogo

#### London, June 1

(Agencies): Taoba mapang James Bond film nung actress Molly Peters arishi küm 75 nung süogo. Lai 1965 James Bond film Thunderball nung actor Sean Connery den külemi shilem agi.

La asüba osangji May 30, 2017 nü official James Bond Twitter ajanga metetdaksü. "Molly Peters arishi küm 75 nung asüba osang angashia onok jashir. Onoki lar kibong den asüku lemsateper" ta parnoki metetdaksü.

Molly Peters ji 1942 küm Walsham-le-Willows kübok Suffolk yimtsüng nung aso aser lai Playboy o Parade amala magazine tem nung model ka ama shilem agia tenzük.

La arishi küm 23 asüdang James Bond



director Terence Young-i la angu aser "Thunderball" film nung shilem agidaksü.

Iba sülen Molly Peters-i "Don't Raise The Bridge,

Lower The River" film nunga shilem agi aser TV sentongtem- "Armchair Theatre" o "Baker's Half-Dozen" nunga shilem agia liasü.



Germany yimtiba Berlin nung Hollywood actor Dwayne Johnson den co-stars- Priyanka Chopra, Jon Bass, Zac Efron, Ilfenesh Hadera, Alexandra Daddario aser Kelly Rohrbach nungertem Baywatch film ajungketba sentong nung külemi tangokba noksa ka angur.

### TAN HOPTA ATEMA - KOMA SÜLA ?

Q Central government-i Nagaland nung nashi maleptsü aser shibelen mesüdaksütsü asoshi army nem tashi agütsü nunga koma süla ?

Olong 20 shi nung June 02, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

## Priyanka online nung aitsüba dak sendakba nung ni kecha telangzüba magütsütettsü: Big B



Brihostibarnü Germany yimtiba, Berlin nung Priyanka Chopra aser Ato kilonser, Narendra Modi na tangokba noksa angur.

**Mumbai, June 1** Ato kilonser, Narendra Modi (Agencies): Nüngtugu actor den ajurutepdang actress, Amitabh Bachchan-i ashiba agi, Priyanka Chopra süoshi dak

sendakba nung online nung aitsütepa atema pai telangzüba magütsütettsü.

Priyanka-i yashi Berlin nung Modi den ajurutepa liasü aser iba mapang nung tangokba noksa ka lai social media nung lemsatep. Ajisiüaka noksa nungji la süoshi dak sendakba nung nisung kari la aija laisü. Parnoki la PM den ajurutepdang tim mesüi süoshi kanga tatsü asem, ta aitsü.

Priyanka aitsüba dak sendakba nung Bachchan dang asüngdangdang pai osangbenertem dang yamai langzü, "Ni PM-a masü mesüra Priyanka-a masü anungji ni kodaser telangzüba agütsütettsü."

Arishi küm 74 tain actor ya Maharashtra CM Devendra Fadnavis kinungtsü Amruta Fadnavis-i atenba ken 'Phir Se' sayaba mapang nung adenba mapang pai iba telangzüba agüja laisü.

Iba ken ya Ahmed Khan-i direct asü. Iba ken nung maneni Amruta aser Bachchan naprongla adoker.

Iba ken ya Jeet Gangulii-i mejem aser Abhijit Vaghani arrange süa liasü.

## India nung 6GB RAM aliba Samsung Galaxy S8 Plus sayaogo

**Mumbai, June 01** (Agencies): RAM 6GB, internal storage 128GB aliba Samsung Galaxy S8 Plus India nung sayaogo aser iba phone ya sen 74,990 agi linük tesem ajunga nung June 9 nungi angutsü.

Galaxy S8 Plus ya 'Midnight Black' sentsü nung angutsü.

"Galaxy S8 aser Galaxy S8+ takok ngua sayaba ajanga premium smartphone segment nung Samsung ya temaba jenjang nung aliba sayur. Galaxy S8+ nung RAM 8GB aser internal memory 128GB lir, aser iba phone amshirtemi mapa tali inyaktettsü," ta Samsung India, Mobile Business nung Senior Vice President, Asim Warsi-i ashi.

Galaxy S8+ ya Samsung



Shop aser Flipkart nung June 2 nungi tenzüka jelia meka-a ayutsü akoktsü. Iba phone den külemi Samsung ajanga

'wireless charger' agütsütsü.

Samsung Galaxy S8+ indang display ya 6.2-inch Quad HD+ den resolution 2960x1440 aser pixel density ya 529ppi alitsü. Iba phone tejaklen aser tesülen Corning Gorilla Glass 5 inoka lir.

Samsung Galaxy S8+ phone tasazük ya 159.5 x 73.4 x 8.1 mm aser tuozük gram 173 alitsü. Iba smartphone tasenba indang processor ya Octa-core (2.35GHz Quad + 1.9GHz Quad, 64 bit aser 10 nm alitsü.

Galaxy S8+ indang tesülen camera ya Dual Pixel 12MP den IOS aser F1.7 aperture aser tejaklen camera ya 8MP sensor den auto-focus aser F1.7 aperture alitsü.

Samsung Galaxy S8+ indang battery tashi ya 3500 mAh alitsü.

## Indus OS aser US nung amenoker aliba Digital Turbine na longjemogo

**Delhi, June 1 (Agencies):** CEO Rakesh Deshmukh-i India indang smartphone operating system Indus OS company-i Brestobarnü US nung amenoker aliba 'mobile platform company Digital Turbine, Inc' den longjemba sangdongogo.

Taoba ita parnok indang mobile app campaign ajungkettsü asoshi Indus OS-i Digital Turbine's Ignite platform ka amenoka liasü.

"Digital Turbine den longjemba ajanga local market-i aginüba ama app tem agütsütettsü aser customer tem nem tajangshiba tajungba agütsütettsü," ta Indus OS

ashi.

Indus OS ya tang smart phone model 80 nung smartphone million 8 shi nung keta lir aser 2020 tashi nungbo million 100 jungdaktsütsü nükjidong lir.

Digital Turbine ya mobile platform company ka lir aser parnoki app tem screen nung connect sütsür. Parnoki tang tashi alima ajunga nung app million 500 dak tali install sütsüogo.

2016 tashi nung Indus OS ya India nung mobile OS nungtugutem rongnung tanabuba jenjang nung lir.

## Yu Yureka Black sen jenjang 8,999 yong sayaogo



phone nungtugutiba rongnung ka kümogo.

Iba phone tasenba nung ya Qualcomm Snapdragon 430 SoC, 4GB of RAM aser Android 6.0.1 Marshmallow keta lir.

Maneni phone nung 2.5D Corning Gorilla Glass 3 densema 5-inch Full HD IPS LCD display keta lir aser iba ajanga 4G VoLTE dena support asür.

Yu Yureka Black nung battery tashiji 3,000 mAh lir aser iba den külemi 32GB internal storage keta koba microSD card ka amshia atsülangtettsü.

Phone nung tanga feature tem rongnung tesülen camera nung 13 megapixel Sony sensor den külemi dual LED flash aser tejaklen camera nung 8MP den külemi idakjia LED flash keta lir.

Yureka Black smarthphone ya June 5 nü nungi tenzüka Flipkart nung sen 8,999 yong angutsü.

**June 1, 2017 (Agencies):** Yu Yureka Black Brestobarnü sayaogo aser iba phone ya e-commerce site Flipkart nung angutsü. Yu Yureka Black nung 'all-black design' den külemi tanga features tema update sür aliba angutsü. YU Televentures ajanga ashiba agi, toba küm ana tsüngda nung parnoki smarthphone million asem dak tali yokogo aser iba ajanga 'netizen' tem rongnung iba

## NASA-i alima nung mezüngbuba Mission Sun 2018 nung tenzüksü

**June 01, 2017 (Agencies):** Anü-i atutsü asoshi NASA-i maparen taruba küm tenzüksü aser iba sentong ajanga nungjang petinutem indang 'atmosphere' bushisüngdang tejangja nung agitsü.

Anünglaki atutsü yangluba tayimtsü dang Parker Solar Probe ta tenüng agütsü aser iba tenüng ya astrophysicist, Eugene Parker nungtem nung jatsü. Eugene Parker-i küm 60 tejaklen 'solar wind' indang takzüteta yutsü.

"NASA-i anünglak tayimtsü nung akümlir tenüng jatsüba ya tang mezüng lir," ta NASA indang Science Mission Directorate nung associate administrator, Thomas Zurbuchen-i ashi.


Iba anünglak tayimtsü/ spacecraft tasazük ya gari tila ka amai lir, aser iba tayimtsü

nung technology tasen aika inoka lir. Iba tayimtsü ajanga nungjang petinutem indang tesüngmangtsütem aser memetetjem aliba otsütem bushitettsü aser iba den külemi anü idang 'Corona' atsükba indang bushisüngdang asütsü.

Parker Solar Probe ya tanga spacecraft temi moutetba tesem ajanga anü indang atmosphere ajanga aitsü aser anü tatsük den radiation balala ajurutsü aser nisungtemi petinutem tanatiba nungi repringtettsü, ta NASA-i ashi.

Anü tatsük nungi kümzüka alitsü asoshi iba spacecraft ya 'carbon-composite shield' inch 4.5 temelem inoktsü.

Iba spacecraft ya 2018, July 31 nungi tenzüksü '20-day window' mapang NSAS indang Kennedy Space Centre, Florida nungi yoktsü.



Mumbai, June 01, 2017: Brihostibarnü Mumbai nung 'Phir Se' ken sayaba sentong nung Actor, Amitabh Bachchan aser Maharashtra Chief Minister, Devendra Fadnavis kinungtsü, Amruta Fadnavis na külemi tangokba noksa nung angur.





New Delhi, June 01, 2017: Bodhbarnü New Delhi nung Union Minister for Finance, Defence & Corporate Affairs, Arun Jaitley den Ministers of state for finance aser Finance Secretary temi Centre nung BJP-i aniba NDA sorkar küm asem ajungba dak sendakba nung osangbenertem den jembiba noksa nung angur.

### Demonetisation ajanga India indang GDP 6.1% tashi ajema aluogo

**New Delhi, June 01 (Agencies):** Yaküm Narendra Modi-i aniba Centre sorkari benokba demonetization ajanga India indang GDP ainba shilem 6.1 tashi ajema alua alima nung rongsenkettsüing jenjang tekaratiba ainba jenjang makai kümogo.

Tesüiba küm asem nung rongsenkettsüing jenjang ainba kanga mezülongi akümba ya tongtibangsüa, manufacturing aser service sectors jenjang mejungi akümba ajanga lir.

Narendra Modi-i aniba NDA sorkar küm asem ajungba benjungmung mapang ka nung India rongsenkettsüing jenjang mejungi akümba osang ya jungkai adoker.

2015-16 küm GDP growth shilem 8 liasü aser iba küm jakdang shilem 7.5 liasü.

2016-17 küm linük nung aluyimba sector nung jenjang jungaka GDP jenjang ainba anüa akum.

2017 küm mezüngbuba ita

asem (first quarter) nung China GDP shilem 6.9 inna liasü. 2015 küm GDP ainba shilem nung India-i China linük ajateta liasü.

Central Statistics Office (CSO) osang ajanga metetdaksüba agi, 2016-17 küm tatemsabuba ita asem nung India'er Gross Value Added (GVA) shilem 5.6 tashi ajema alu. 2015-16 küm India'er Gross Value Added (GVA) shilem 8.7 liasü.

2016 küm January-March ita nungi tenzüka GVA ponguben tashi ajema alua liasü.

2016 küm November ita nung Modi-i aniba NDA sorkari senpak 500 aser senpak 1000 notes tamshidak anenja liasü; aser ibaji sen tamshidak shilem 87 shi liasü, koba ajanga linük tesem ajungalen nüburtem mejungi kongshiba den külemi rongsenkettsüing dak sendakba maparen ajak nung kongshia liasü.

Sen tamshidak anentsüba ajanga fourth quarter growth

nung kongshir asü? ta asüingdangba langzüdang Chief Statistician T C A Anant-i, iba atemaji tasadangba temeja ka nüngdaker, ta ashiba den külemi, third aser fourth quarters mapang rongsenkettsüing nung kongshiba kuli rongnung ibaji-a ka asütsüa akok, ta ashi.

Chief Economic Advisor, Arvind Subramanian-i, demonetisation ya rongsenkettsüing nung mapang tatsüka asoshi taoksatsü ka liasü, ta ashi.

Demoniotization ajanga fourth quarter nung construction sector nung kanga mejungi kongshi, aser iba mapang nungji shilem 3.7 ajema alu.

CSO osang ajangasa ashiba agi, demonetization ajanga manufacturing, mining, trade, hotels, transport, communication, services, broadcasting, financial, real estate aser professional services indang rongsenkettsüing nung kongshia liasü.

### GST Council senden June 3 nü amentsü


**New Delhi, June 01 (Agencies):** Centre-i Goods and Service Tax (GST) dak sendakba supplementary bill pezü agizükba sülen India linük nung saru ka dang alitsü nükjiding nung Brihostibarnü Minister of State for Finance, Arjun Ram Meghwal-i, osettsüet/chiyungtsü balala nung sen latettsü atema GST council senden amentsü, ta metetdaksü.

Taküm March 29 nü agizükba Supplementary bill pezüji- Central GST Bill, 2017; Integrated GST Bill, 2017; GST (Compensation to States) Bill, 2017 aser Union Territory GST Bill, 2017 lir.

New Delhi nung osangbenertem den jembidang Meghwal-i, "GST council

senden June 3 nü amentsü, aser iba senden nung osettsüet/chiyungtsü balala nung sen latettsü. India rongsenkettsüing aintsü atemaa jembitsü. International Monetary Fund (IMF) osang ajanga ashiba agi, India indang Gross domestic product (GDP) aintsü, aser terenlok aliba tanga linüktem den-a tokteptettsü. Iba ya International tentettemi asadangtetba lir; 2030 küm tashi nungbo linüka terenlok linüktem rongnung adentsü," ta ashi.

Yashi Union Finance Minister, Arun Jaitley-i, senden nung iba Bill agizükba ya putiotsü ka lir, aser iba mapatong ajanga linük nung temelenshi tulu alitsü, ta metetdakja liasü.



New Delhi, June 01, 2017: Brihostibarnü New Delhi nung 15buba BSF investiture sentong nung Union Home Minister, Rajnath Singh-i constable, Godhraj Meena nem Police Medal agütsüba sülen pa dak azüitba noksa nung angur. 2015 küm August 5 nü Jammu & Kashmir kübok Udampur nung telungpurtemi BSF indang bus ka amakdang pai telungpur anema tasü itta raraa liasü.

### J & K nung Army temi Pakistan nunger sepai pongu tepset

**New Delhi, June 01 (Agencies):** Brihostibarnü Pakistan Army temi Jammu & Kashmir kübok Rajouri aser Poonch district na nung ceasefire ozüing alema inyakba sülen India sepaitemi parnok den raradang sepai pongu khaset aser trok yirutsüogo, ta tanü osang ka ajanga metetdaksü. Tanep Pakistan sepaitemi

ceasefire ozüing alema inyakba sülen Indian Army temi Bhimber aser Battal sectors kübok LoC nung Pakistan nunger posts nung injang yoka liasü.

Brihostibar anepdang Pakistan sepaitemi Rajouri district kübok Nowshera sector nung aliba forward posts aser Poonch district kübok Krishnagati sector nung aliba

LoC nung mortar aser injang yokba ajanga GREF aayanger ka asü aser BSF sepai ana yirua liasü.

Iba dak sendakba nung Pakistan Foreign Office-i deputy High Commissioner J P Singh jaokogo. Pakistan-isa sangdong ka ajanga, India tsütsülen nungi injang aika khadokba ajanga nisung asem yiruogo, ta metetdaksü.

### PM Modi o Russia Tir, Putin na onük aika nung ken o jembi

**New Delhi/St Petersburg, June 01 (Agencies):** Brihostibarnü India Ato kilonser, Narendra Modi o Russia Tir, Vladimir Putin nati linük ana tsüingda tesendaktep den regional aser international onük aika nung ken o jembiba den külemi linük ana tsüingda energy aser shishilembaba nung tesendaktep tajungba akumtsü atema jembio.

Iba senden nung Modi-i Putin dang, pa Ato kilonser ka ama par jila semdangtetba atema pelar, ta lemsatep.

Tang mezüing Russia nung India-Russia summit Russia yimtiba, Moscow nung masü saka St Petersburg nung ang ayonga kaogo.

"Teti agia international tesendaktep nung khenkhen jenjang mejungi akümer mesüra

khenkhenbo jenjang junga akumer, ajisüaka India-Russia tesendaktepbo teti junga alibaji putiotsü nung lir," ta Ato kilonser, Modi-i ashi.

Modi-isa India linük Shanghai Cooperation Organisation (SCO) nung züingsem akumtsü atema Russia-i pusemba atema Putin dang pelaba lemsatep.

Putin-i, tan hopta India SCO nung züingsem ka akumtsü, ta metetdaksü.

Modi-isa tanep pai leper semdanga World War II nung asürtem nem akhüm agüja liasü.

Modi-i Putin dang, "Taküm tenla agütsürtem kibong nung na tekolak lir, nü adianu-ia taküm tenla agütsü," ta ashi.

Küm 70 tejaklen World War II mapang nung Putin'er adianu ka süa liasü.



Patna, June 01, 2017: Bihar nung Municipal election agitsü mapang ana nung Brihostibarnü Security sepaitemi Patna yimti nung 'flag march' agiba noksa nung angur.

# Aibelenatayimtsü nungji amakbamapang Philippine mitkar 10 asü



Marawi, June 1, 2017: Maute teloki Philippines nung Marawi City yimti tuluba ka agiogo. Sorkar sepaitem-i telungpur telok anema raradang ki ka arongba noksa nung angur.

**Marawi, June 01 (Agencies):** Marawi yimti nung Philippine sorkar den külemi tsükchirtem anema rarar telok-i iba yimti nungi telungpurtem meindoktsü meranga raraba nung tayimtsü nungi bomb pokloktsüba mapang mitkar ter asü, ta defence minister-i ashi.

Marawi City tiyong nung Bodhbarnü air force SF-206 ana nungi bomb pokloktsüba mapang mitkar yirur 7 liasü. Mezüing tayimtsü nungi bomb yokba ya target shidak nung kongshi saka tanabuba tayimtsü nungi yokba bomb ya target tai

nung amshi, ta osang ajanga ashi.

Marawi nung ISIL den tesendaktep aliba telungpurtemi müketbanger aliba nüburtem kümzüksü Philippine mitkartemi nangzuka lir.

"Asen mitkar dak kongshiba osang ya tejashitsü lir. Iba lendong nung aibelen kar alitsü, ali nungi iba bomb yoktsü tutuyuba agütsür mesüra pilot-i aibelen asütsü südi," ta defence minister Delfin Lorenzana-isa ashi.

Islamic State of Iraq & Levant (ISIL) den tesendaktep alir Maute telungpur temi

Marawi City nung tesem kar amokbanger anogo ti ajunger, aser item telungpurtem den Philippine mitkartemi helicopter amshia rarar.

Marawi nung anogo 9 tashi raraba mapang mitkar 38, civilian 19 aser telungpur 120 taküm samaogo. Iba raraba tesem nungi nisung meyrjang ter tashi pei ki doktsür tesem balala nung jenshia lir.

Maute telungpur den raradang tanga linük nungi mitkartem taküm samar ya Saudi, Malaysian, Indonesian, Yemeni aser Chechen linüktem nungi lir, ta minister-i ashi.

# Pei lima doktsür aor nisung 44 Niger lise mlima nung asü

**Niger, June 01 (Agencies):** Pei lima doktsür tanga linüki aortem rongnungi tetsür aser tanur densema nisung 44 Niger lise mlima nung sür lia ngutet. Parnok ya Brehostibarnü Libya-i aoba mapang parnok amenbaga ri raksa aser iba lise mlima majangteti asü, ta iba tesem nung aliba ketdangsertemi ashi.

"Item nisungtem par lima doktsür aoba mapang asür ya 44 lir," ta Sahara lise mlima tezülen aliba Agadez indang

mayor, Rhissa Feltou-i ashi.

Item nisung 44 asüba indang osang tejanga metettsü asoshi Red Cross nung inyakertem iba tesem-i yokogo, ta osang ka ajanga ashi.

Osang kar ajanga ashiba agi, item nisungtem ya tziira agi asü, ta ashi.

May ita tetenzüklen Niger doktsür Algeria-i aoba mapang nisung ti tasü mang ngutet, item rongnung nisung pongu bo tanur liasü.

Kasa May ita, nungsa mitkartem north Niger tsütsü sema jajaba mapang pei lima doktsü aor nisung 40-shi ngutet. Parnok ya Libya-i nisung shibelener temi bener aoba mapang lise mlima nung doktsür ao.

Item nisungtem ya Gambia, Nigeria, Guinea, Senegal aser Niger nungi lir aser Libya indang tzüküm nungi Mediterranean ajanga Europe-i aotsü teimla nung abusoba lir, ta ashi.



Sirnak, June 1, 2017: Senoba district nung Cougar military helicopter ka light inzü nung kongshir tsükokba lendong nung Turkey nung sepai 13 asü. Asürtem rongnung tasü mang tenet sepaitemi akhüm agüja bener jajaba noksa nung angur. (Sirnak province, Turkey June 1, 2017).

# Paris climate accord nungi China mainshitsü

**Beijing, June 01 (Agencies):** Paris climate accord nungi United States ainshiaka China bo mainshitsü, ta shiogo.

Iba tezüngzüktep kümzuka ayutsü asoshi European Union aser tanga linüktem den külemi lungjemer inyaksü, ta China Ato Kelonser, Li Keqiang-i ashi.

Kin ana tsüngta ken o aika German Chancellor, Angela Merkel den Berlin nung jembiba sülen, 'international community' den külemi tzü mopung kümzuka ayutsü atema mapa ka nungi ka inyakyonga aotsü tejangraba lir, ta Keqiang-i ashi.

"China ya tongtibang tembar ka kümogo," ta Merkel-i osangbener den jembiba senden ka nung ashi.

Greenhouse gas tali madokdaksütsü asoshi linük tulu aika 2015 küm Paris nung sentepa tezüngzüktep agiba nungi US anentsü, ta osang angashiba sülen linük ana tsüngta jembiba osang ya metetdaksü.

Carbon dioxide adokdaksür rongnung China ya temaba aser US ya tanabuba jenjang nung lir. 2015 küm Paris agreement agiba mapang linük ana ya tongti shilem agia zülutep. Iba tezüngzüktep agiba nung linük 195-i shilem agi aser 2100 tashi

nung alima indang temperature Celsius degree ana agi tatsükba akümtsü aliba nungi kümzüksü asoshi maparen inyaksü zülua lir.

Iba tezüngzüktep nung China tir, Xi Jinping aser taoba US tir, Barack Obama-i sign süa liasü. Iba tezüngzüktep metoktsütsü asoshi Jinping aser Obama-i Trump dang shiogo.

Trump-i iba tezüngzüktep nungi ainshitsü asoshi US tir election agitsü nübuyim mapang nangzuka liasü, saka White House nung iba ken o mechi ketdangsertem telemsa adoka lir, ta osang ajanga ashi.

Iba tezüngzüktep nung alima ajunga nungi linük ana dang maden - Syria aser Nicaragua - aser US-a linük ana den atentsü tebilemba osang angazüker.

Trump-i par linük iba tezüngzüktep nungi ainshitsü lemtetra Europe-i khuret abentsüla, ta European Commission tir, Jean-Claude Juncker-i ashi.

Iba tezüngzüktep nung aliba ama inyaksü asoshi sentong yanglua aliba ya European Union aser China-i Hokulbarnü Brussels nungi senden akaba mapang sangdongtsü imlar.



Helsinki, June 1, 2017: June 1 nü Helsinki, Finland nung Finland nüjiso ngur küm 100 ajungba benjungmung nung Norway Chubatsür, Sonja aser Chuba Harald V, Denmark Chubatsür Margrethe, Finland Tir, Sauli Niinisto den pa kinungtsü, Jenni Haukio, Iceland Tir, Gudni Thorlacius Johannesson den pa kinungtsü, Eliza Jean Reid aser Sweden Chuba Carl XVI Gustaf aser Chubatsür Silvia nunger Presidential Palace nung külemi nokdaker tangokba noksa nung angur.

# Pakistan Army indang headquarter belentsü

**Islamabad, June 01 (Agencies):** Rawalpindi nung aliba Pakistan Army indang General Headquarters (GHQ) ya Pakistan yimtiba, Islamabad-i belentsü sentong lir aser iba atema project tasen yanglua kisü-jensü tenzükogo.

Iba telemtetba agiba osang ya Capital Development Authority nung ketdangser kati Public Accounts Committee (PAC) indang subcommittee senden ka nung metetdaksü.

2008-09 mapang senotsü nung tetsükdaksü ajuruba ajanga GHQ belentsü sendong ya iba mapang army tekolak inyaka alisang, Gen Ashfaq Pervez Kayani-i anendakja liasü.

Audit osang ajanga ashiba agi, Capital Development Authority ajanga GHQ atema D-11 aser E-10 nungi ali square yard shia sen 1,159 agi ali acre 870 alizük aser iba ali ya GHQ nem square yard shia sen 200 agi agütsü, ta ashir.

GHQ nem jenjang tajemba agi iba ali agütsüba ajanga Capital Development Authority takoksa sen million 4,034 angu, ta osang ajanga-sa ashi.

2009 küm kiralongrar trok-i Army indang sübutsü sübur General Headquarter amak aser iba raraba mapang mitkar trok aser kiralongrar pezü asü.

Pakistan nüjiso ngur küm 70 jungogo aser iba linük ya mitkartemi timba yimsü süa arudagi.

# Mezüngbuba Nagaland Fashion Week Delhi nung akatsü



**New Delhi June 01 (TYO):** Nagaland sorkar teyari dena New Delhi nung mezüngbuba Nagaland Fashion Week taküm August mesüra September ita akatsüba sangdongogo.

Brehostibarnü New Delhi Nagaland House nung Nagaland House Delhi, Principle Resident Commissioner, Jyoti Kalash densema lia osangbenertem den jembidang iba osang sangdonga liasü.

Iba sentong nukjidongji Naga nung sobaliba, Textile aser International jenjang nung raliwaliba ajungketsü asoshi lir.

Sentong nung designer tem Nagaland kija nung masü saka linük nungi aser bendanglen nungia dena shilem agitsü. Maneni iba sentong ajanga Naga nung models, designers aser südakertem nem international jenjang nung pei sempet sayutsü asoshi maongka agütsü.

Nagaland Fashion week nung mendenbubaji Harshit

Dhingaun lir. Pa ya Delhi Fashion Club nung mendenbuba aser Online Bollywood VJ lir.

Ethiel Konyak ya Nagaland nung Regional Head aser Esther Arenla Jamir ya Delhi Regional Head asütsü. Tenaprongla ya Delhi Fashion Club Co- Founders aser Associate Creative Director lir.

Iba osang agütsüba mapang Nagaland Fashion Founder aser Delhi Fashion Club nung mendenbuba Harshit Dhingauni ashiba agi, "NFW ya Nagaland aser Northeast India atema mezüngbuba Premier international Fashion week asütsü aser iba ya ajanga Naga nung sobaliba, Textile, Handicraft aser Handloom tem asendenshiba den külemi Naga nung aser North east Fashion Culture (Fashion show, sobaliba sentong balala, kentenba aser Exhibition balala sayaba) ajanga alima nem metetdaksütsü. Iba anogo asem sentong ya Delhi nung amongtsü."

Maneni iba sentong nung

IIFT ( International Institute of Fashion Technology) mendenbuba Ratnadeep Lali fashion designing tsütsü Naga nung kaketshir 10 yarinüba metetdaksüba den külemi Nagaland sorkari-i dang nungita yarira Naga nung kaketshirtem exposure aser alima ajanga nung mapa balala asoshi lenmangtem lapoktsü mechi nung Paris aser London-i anir onüba lemsatepa liasü.

Iba sentong nung ya FDCI Designer Sonia Jetleey aser Central board of film cooperation ( CBFC ) nung züngsem Linda Newmai nungera densema liasü aser parnoki iba sentong tajung ayongzükba atema tenüngsang agutsü.

Maneni iba sentong nung kin balala nungi kaketshirtema densema liasü.

Nagaland Fashion Week ya August mesüra September ita Delhi Indra Gandhi national centre for arts, Applications nung akatsü aser Form tem www.nagalandfashionweek.com nung angutsü.

# Tang mezüng Nagaland health project tenzükogo

**Kohima, June 01 (TYO):** June 1, 2017 nü Capital Convention Centre, Kohima nung tang mezüng Nagaland Health Project tenzükogo; iba sentong nung tongti tesemdangerji Health and Family Welfare Minister, P. Longon liasü.

State level project ya World Bank-i senotsü agi yaritsü.

Iba Project nukjidong ya, anema alibaren service tem tajungba akumtsü aser state nung tongtibang tesemtem nung nüburtemi teyari agitetsü atema lir.

Iba project kümsükji küm 5-7 asütsü aser iba project nung US sen million 60 (India sen crore 390.5) asütsü, iba nungji external assistance US sen million 48 aser state sorkar nungi US sen million 12 million.

**Project telemsa ana:** Mezüngbuba telemsa: Community Action for Health & Nutrition- Iba nukjidong ya nüburtem nem tashi agüja nüburtemi ketdangsüa Health & Nutrition Programs services

ajungketsütsü aser iba nungi teyari agitsü atema lir.

Tanabuba telemsa: Health System Development- Iba nukjidong ya health service balala agütsüba aser ketdangsüba nungittsü atema lir, aser iba nungji tzü aser merükmejuba den solar

electricity densema service balala ajungketsütsü atema lir.

Health System Development telemsa nungji supply chain management system, information & communications technology (ICT), health human resource asalentongtem desema alitsü.

**Office Of The  
LONGCHEM ADHOC TOWN COMMITTEE  
B.P.O. LONGCHEM, P.O. MANGKOLEMBA  
MOKOKCHUNG : NAGALAND**

**PELABA SANGDONGER**

Japukong Administrative Headquarter Longchem town kümetetba sülen küm ishika tejakdang nungi 'Welcome gate' ka nungdak ta ajiteta liasü.

Iba indang taoba küm Dr. N. Benjong Aier, Hon'ble Parliamentary Secretary CAWD & Taxes den lemsatepdang pai yaritsü ta nangzuka liasü. Pai nangzükba ama taküm 2017, March ita tetenzüklen sen anepalua bener arua Committee ket nung amoktsüogo.

Iba sen jagi 'Welcome to Longchem' gate renemer 2017, March 5 nung paisa ribbon mejepdanga lapoktsüba tepela osang sangdonger. Pa taküm, wadang aser kibung jentipur asoshi tali moajangma.

**Sd/-  
A. Panger Longchar  
Vice Chairman  
Adhoc Town Committee, Longchem.**

# Pel AbA I emsAtePer

Temeim Ojala, **asür Nokotenla** (Khar) shiranga aliba mapang nungi tasünü tashi kija aser telok balala ajak nübo, rongsen, shisatsu aser sarasadem agi onok yariba tepela iba osang ajanga nenok den onok tepela lemsateper.

Nenek temeim mapa tajung onok molungjang nung teti alitsü. Tsüngremi nenok ajak moajang ta ozü-i sarasademtsür.

- **Chirnur, Semchir aser Kinunger.**



**ASO: 1927  
ASÜ: 27/05/2017**

# Pelaba Lemsateper

**ASO : 18/01/1951  
ASÜ : 19/05/2017**

**TEMJEN PETER,  
FORMER DIRECTOR  
A.I.R (ALL INDIA RADIO)**

*"Nisung tajung ka aliba  
tesem nung  
temenungratsü jenti lir."  
- Ronald Reagan*



Onoki teti meima aliba asür, **TEMJEN PETER** mapang tatsüka shiranga alidang aser May 19, 2017 nü asüba mapang tashi nung kinunger, medemer, Arogotem, lokti tentettem, kiyongertem aser temeimer kwikati nübo, rongsen aser talisa tamang sarasadem agi onok den yaritepogo, nenok ajak dang kinungertemi pelaba metetdaksür.

Talisa onoki item dang ya pelar:

1. Doctors & Nurses of Bethel Hospital, Kohima
2. Doctors & Nurses of Dispur Hospital, Guwahati
3. Kohima Ao Baptist Arogo
4. Molungyimsen Senso Telongjem, Kohima
5. Molungyimsen Senso Telongjem, Dimapur
6. Lower Chandmari Panchayat, Kohima
7. Lower Chandmari Youth Organisation, Kohima
8. Innovations, Bayavu, Kohima
9. Deputy Resident Commissioner, Guwahati
10. Ao Church Pastor, Guwahati
11. All India Radio, Kohima.

Onoki kija shia dang pelaba melemsateptetba atema sasar, saka Tsüngremi nenok ajak tali moajangma.

- **Temeim kinungtsü, jabaso, jala,  
jabaso kinungtsü aser semchir.**

**V.J'S COACHING CENTRE**  
D.C. COURT ROAD, DUNCAN, DIMAPUR (ESTD. 2000)

**ADMISSION GOING ON**

⇒ Offer Extensive Coaching for the Repeaters of  
**Class-X / XII-Arts / XII-Com / XII-Sci. for  
Improvement & Repeaters**

⇒ Hostel attached for both Boys & Girls (Separately)


**Contact : 03862-248394 / 248464 / 9436600530**

# Yaongyimsen Chiden Semchir Telongjem TENÜNGSANG AGÜTSÜR

Yaongyimsen yimtsüng nungi Wb. Onentiba aser Wt. Limalemla na jala Kr. **Pursenla**-i Jubilee Memorial School, Mokokchung ICSE (Indian Certificate of Secondary Education) Class- X Subject pongu (5) nung distinction 84% marks nguteta takok tulu anguba asoshi Chiden Semchir- i la nem tenüngsang agütsür.

Tsüngremi nü taküm aser sempet maneni moajangma.

**Sd/-  
S. Wati  
Chiden Semchir Telongjem, Yaongyimsen**



# ALI TAYOKTSÜ LIR

Full Nagarjan nung ali sq. Ft. nung Rs. 200/- agi ayoker, anungji talinertemi iba number nung contact südaktsüner : # 9612356726 / 8974111140

# Thailand Open nung Sai Praneeth Quarter-finals tongogo



**Bangkok, June 1 (Agencies):** Mongolbarnü Thailand Grand Prix Gold badminton asaya nung India nung Badminton asayar B Sai Praneeth-i Malaysia nung Iskandar Zulkarnain koka quarter-final-i iogo.

Singapore Open champion, Praneeth-i iba asaya nung Zulkarnain 21-13, 21-18 agi ayong-ayonga akok.

India nung asayar ya taruba asaya Thailand nung Kantaphon Wangcharoen den asüng asayatsü.

Aji saka kasa asayamong nung India nung asayar Sourabh Verma aser Sai Uttejitha Rao Chukka tetsür aser tebur kija asaya nungi tsükogo.

Tebur kija asaya nung Sourabh-i France nung Brice Leverdez den kanga meranga

asayar makok. Leverdez-i 16-21, 25-23, 11-21 agi Sourabh madak takok angu.

Maneni tetsür kija asaya nung Sai Uttejitha Rao-i Thailand tsür, Pattarasuda Chaiwan 15-21, 17-21 agi tsükdaktsüogo.

Praneeth aser Zulkarnain na taoba mapang nung khen dang asayaa lir aser iba asaya Praneeth-i koka liasü. Iba asaya mezüngbuba game tetenzük nung Praneeth-i point 5-1 ngua Zulkarnain jakdang liasü, iba sülen Malaysia nungba yagi kanga junga asayaa saka tatem nung pai mezüngbuba asaya 21-13 agi ayong-ayonga akok.

Tanabuba asaya tetenzüklenbo Zulkarnain-i point 9-7 nguteta Praneeth jakdang liasü saka Praneeth-i asendenshir asayaa iba asaya minute 41 buba nung akok.

# 2017 French Open: Andy Murray, Wawrinka aser Radwanska nungeri takok angu

**Paris, June 01 (Agencies):** Tebur tennis asayar rongnung World No. 1, Andy Murray taküm 'clay court' nung akanga junga masayateti arudagi aser yamaji Brehostibarnü French Open nunga Slovakia nung Martin Klizan madak kanga saka takok angu.

Murray aser World No. 50, Klizan asayaba nung Scotland

nungbai 6-7(3), 6-2, 6-2, 7-6(3) agi Klizan madak takok ngutet.

Kasa anogo nung World No. 3, Stan Wawrinka aser Ukraine nung Alexandr Dolgoplov tsüngta kija asaya nung Wawrinka-i 6-4, 7-6 (5), 7-5 agi takok ngua pa French Open tasembuba round tongtetogo.

2015 French Open nung

Stan Wawrinka ya champion liasü.

2017 French Open tetsürtem kija asaya tanabuba round Brehostibarnü asayaba nung Agnieszka Radwanska-i 6-7 (3), 6-2, 6-3 agi Alison Van Uytvanck madak takok angu.

World No. 10, Radwanska-i France tsür, Alize Cornet den asayatsü.

# Mejangjaba nisungi LeBron James'er ki menentsü

**Los Angeles, June 01 (Agencies):** Nüngtugu Basketball asayar LeBron James'er ki Los Angeles nung aliba mejangjaba nisung kar-i menentsü, ta Police-i Bodhbarnü metetdaksü. Iba tatalokba ya Cleveland Cavaliers asayatem NBA finals asayatsü anogo ka lia adalok.

'Graffiti' ya James'er tejaklen gate nung spray-paint sütsür liasü. Bushisüngdangertemi iba maparen nung densema aliba

nisungtem bushidangdar, ta Los Angeles police otongdar Norma Eisenman-i ashi.

Eisenman gate nung kin ka anema o tamajung zülüja alibaji memetdaksü. Iba osang ya police nem Bodhbar anepongi metetdaksü aser iba sülen ojangtemji nübangtsüogo, ta lai ashi.

"Nü ket nung sen aika liaka, na kanga nüngtugu süaka aser nisung aikati na sabuaka America nung tanak nisung ka asüba ya kanga tasak lir. Asenok

lokti ka ama aser onok African-American ka ama America nung ka ama bilemstü asoshi mapang talangka lir, " ta James-i osang benertem dang ashi.

Iba tatalokba mapang James west Los Angeles nung par kidang maliasü, ta Eisenman-i phone ajanga ashi.

Arishi küm 32 tain, James ya 'Most Valuable Player' pezüben tashi nguogo. Cavaliers pur Brehostibarnü Golden State Warriors den Oakland nung final asayatsü lir.



June 01, 2017 nü China yimtiba, Beijing nung 'Messi China Tour' mapang osangbenertem senden ka nung FC Barcelona nungi striker, Lionel Messi-i pa sapurtem den tangokba noksa nung angur.

# Indian cricket coach inyaktsü atema Sehwaag-i tenüng agütsü



**New Delhi, June 01 (Agencies):** Taoba mapang cricket asaya nung India nung opener, aser asayar tejen, Virender Sehwaag-i India nung cricket asayar telok nung chief coach inyaktsü asoshi tenüng agütsüogo. Iba mapa inyaktsü asoshi Australia nung Tom Moody aser England nung Richard Pybus natia tenüng agüja lir.

Sehwaag ama iba mapa inyaktsü asoshi India nung taoba mapang 'fast bowler', Dodda Ganesh aser taoba mapang India A coach, Lalchand Rajput natia tenüng agüja lir.

Indian cricket team nung coach mapa inyaktsü asoshi Sehwaag-i pa tenüng agütsüba sülen iba mapa asoshi toktepba mopung melenshiogo. Sehwaag ya tamalena IPL nung Kings XI Punjab telok indang 'tesayur' ka ama inyaka liasü.

Indian cricket team nung coach tekolakba inyaktsü asoshi Board of Control for Cricket in India (BCCI) ajanga taoba hopta tenüng meshia liasü.

England aser Wales nung June 1 nungi 18 tashi ICC Champions Trophy 2017 asayaba sülen tang teinyakdak aliba India nung coach, Anil Kumble mapa nungi anentsü.

Champions Trophy madongdang iba mapa inyaknür tejangrartemi tenüng agütsütsü asoshi BCCI-i sangdongba ajanga nisung aika molungjang nung tebilemba balaka arudakja lir.

ICC Champions Trophy Deobarnü Brimingham nung India aser Pakistan asayatsü aliba atema training agiba aser asaya yimya nung Virat Kohli aser Kumble tsüngda tebilemba balala akümiba ajanga BCCI-i coach tasen shimtsü bushi tetenzük, ta nisung aikati jembir.

# ICC Champions Trophy, 2017 Schedule

Date	Match Details	Time
Jun 01, Thu	England vs Bangladesh, 1st Match, Group A Karrington Oval, London England won by 8 wickets	3:00 PM 09:30 AM GMT / 10:30 AM LOCAL
Jun 02, Fri	Australia vs New Zealand, 2nd Match, Group A Edgbaston, Birmingham	3:00 PM 09:30 AM GMT / 10:30 AM LOCAL
Jun 03, Sat	Sri Lanka vs South Africa, 3rd Match, Group B Karrington Oval, London	3:00 PM 09:30 AM GMT / 10:30 AM LOCAL
Jun 04, Sun	India vs Pakistan, 4th Match, Group B Edgbaston, Birmingham	3:00 PM 09:30 AM GMT / 10:30 AM LOCAL
Jun 05, Mon	Australia vs Bangladesh, 5th Match, Group A Karrington Oval, London	6:00 PM 12:30 PM GMT / 01:30 PM LOCAL
Jun 06, Tue	England vs New Zealand, 6th Match, Group A Sophia Gardens, Cardiff	3:00 PM 09:30 AM GMT / 10:30 AM LOCAL
Jun 07, Wed	Pakistan vs South Africa, 7th Match, Group B Edgbaston, Birmingham	6:00 PM 12:30 PM GMT / 01:30 PM LOCAL
Jun 08, Thu	India vs Sri Lanka, 8th Match, Group B Karrington Oval, London	3:00 PM 09:30 AM GMT / 10:30 AM LOCAL
Jun 09, Fri	New Zealand vs Bangladesh, 9th Match, Group A Sophia Gardens, Cardiff	3:00 PM 09:30 AM GMT / 10:30 AM LOCAL
Jun 10, Sat	England vs Australia, 10th Match, Group A Edgbaston, Birmingham	3:00 PM 09:30 AM GMT / 10:30 AM LOCAL
Jun 11, Sun	India vs South Africa, 11th Match, Group B Karrington Oval, London	3:00 PM 09:30 AM GMT / 10:30 AM LOCAL
Jun 12, Mon	Sri Lanka vs Pakistan, 12th Match, Group B Sophia Gardens, Cardiff	3:00 PM 09:30 AM GMT / 10:30 AM LOCAL
Jun 14, Wed	TBC vs TBC, 1st Semi-Final (A1 v B2) Sophia Gardens, Cardiff	3:00 PM 09:30 AM GMT / 10:30 AM LOCAL
Jun 15, Thu	TBC vs TBC, 2nd Semi-Final (A2 v B1) Edgbaston, Birmingham	3:00 PM 09:30 AM GMT / 10:30 AM LOCAL
Jun 18, Sun	TBC vs TBC, Final Karrington Oval, London	3:00 PM 09:30 AM GMT / 10:30 AM LOCAL

**BILEMDANGANG**  
"Kechisarena ajak nung tepor tajung lir, saka nisung ajakibo mangur."